

ԱՐԱՆ ՈՒ ԱՆԻՆ

Մաս 2

Ինչպես Արան ու Անին սովորեցին հագնվել տարվա եղանակներին համապատասխան

Նպատակ

Զարգացնել տարվա եղանակները տարբերակելու և դրանց համապատասխան հագուստ ընտրելու կարողությունը:

Ընթացք

Ողջույն, ես Անին եմ, իսկ սա իմ եղբայրն է՝ Արան: Դու մեզ արդեն ճանաչում ես, չէ՞ որ մենք արդեն ընկերացել ենք:

Այսօր մենք քեզ ցույց կտանք մեր հագուստները և կպատմենք, թե ինչպես ենք սովորել տարվա եղանակներն ու դրանց համապատասխան հագուստ ընտրելը: Ես և Արան ունենք շատ հագուստներ: Երբեմն մենք չենք կողմնորոշվում, թե ինչ հագնել: Չէ՞ որ զգեստապահարանում հագուստներն այնքա՛ն տարբեր են: Այսօր մենք միասին պետք է սովորենք հագնվել՝ հաշվի առնելով տարվա եղանակները, ինչպես նաև գեղեցիկ համադրման շնորհիվ ունենալ հարմարավետ և ոճային տեսք: Կարծում եմ՝ մեզ մոտ կստացվի: Եվ այսպես..... գնացինք:

Սրանք իմ հագուստներն են, իսկ մյուսները՝ Արայինը:



A collection of paper doll clothes. It includes a blue dress with a white swirl pattern, a green jacket with a yellow butterfly pattern, a red dress with a white polka dot pattern, a blue long-sleeved shirt with a white collar and buttons, and a pair of red shoes with white laces. There is also a pair of black socks with white stripes at the top.





Տղայի զգեստապահարան - անվանի՛ր հագուստները:





Արան երբեմն դժվարանում է հագուստ ընտրելիս. այդ հարցում ես միշտ նրան օգնության եմ հասնում:



Ճիշտ է, նա երբեմն փնթփնթում է՝ «Ա՛խ այս աղջիկները, որքա՛ն թիթիզ են, սիրում են շրջագգեստներ հագնել և այնքան պտտվել, որ գլխապտույտ են առաջացնում»: Բայց ինչ արած, մենք այդպիսին ենք, և խի շա՛տ թիթիզն ենք, չէ՞:




Հարկ է հաշվի առնել, որ հագուստները պետք է կրել մաքուր վիճակում: Մայրիկը հոգ է տանում այդ ամենի մասին և մշտապես հագուստները մեզ տրամադրում է արդեն պատրաստ վիճակում:



Մեր սենյակը շատ հարմարավետ է և կոկիկ: Ես և եղբայրս սիրում ենք կարգ ու կանոն: Բացի այդ, մայրիկին էլ է շատ դուր գալիս, երբ մենք կոկիկ ենք (Տե՛ս «Լվացքի մեքենա-պահարան» խաղը):



Մեզ համար իսկական տոն է, երբ մայրիկի հետ գնում ենք հագուստներ գնելու: Ես ու Արան շատ ենք սիրում գնումներ կատարել և ուրախությամբ ենք նոր հագուստներ ընտրում:



Երբեմն, երբ մենք չենք կողմնորոշվում՝ ինչ գնել, որն է ավելի սիրուն, կամ որ զգեստի հետ այն կարող ենք համադրել:



Այդ հարցում մեզ օգնության են գալիս մեր ընկերները:



Մեր հագուստները շատ բազմազան են. երկարաթև ու կարճաթև շապիկներ, վերնաշապիկներ, շրջազգեստներ, կիսաշրջազգեստներ, տաբատներ, գլխարկներ, բաճկոններ, վերարկուներ, ձեռնոցներ և այլն: Այդ իսկ պատճառով անհրաժեշտ է խմբավորել դրանք ըստ տարվա եղանակների և կրելիս հաշվի առնել եղանակային պայմանները:


Նայի՛ր նկարին, հագուստի ի՞նչ տեսակներ ես տեսնում, անվանի՛ր դրանք:



Այժմ սովորենք, թե տարին քանի եղանակ ունի:

Եվ այսպես, տարին ունի չորս եղանակ՝ գարուն, ամառ, աշուն, ձմեռ:

Տարվա եղանակներ




Նայիր ծառին և իսկույն կնկատես տարվա եղանակների հերթափոխման հետևանքով բնության մեջ տեղի ունեցող փոփոխությունները:



Որքա՞ն ինքնատիպ և յուրահատուկ է դրանցից յուրաքանչյուրը:

Արի նկարագրենք դրանք և տեսնենք, թե բնության մեջ ինչ երևույթներ են տեղի ունենում այդ չորս եղանակների ընթացքում:

Եթե արդեն տարբերակեցիր դրանք, նայիր նկարներին և ընտրիր տարվա եղանակը:



Յուրաքանչյուր նկարի ներքևում կտեսնես այս պատկերները, որոնք ունեն հետևյալ նշանակությունը՝



- գարուն,




- ամառ,



- աշուն,



- ձմեռ:







Այդ եղանակներից ամեն մեկն ունի իր յուրահատկությունները: Մենք պետք է հաշվի առնենք տարվա եղանակները և հագուստներն ընտրենք դրանց համապատասխան:



Նայիր նկարներին. ի՞նչ ես տեսնում: Ասա, թե որ նկարում որ եղանակն է:




Այժմ արի նկարագրենք յուրաքանչյուր եղանակը և ընտրենք դրանց համապատասխան հագուստներ: Սկսենք զարթոնքով. տարվա ամենագեղեցիկ եղանակը **գարունն է:**

Գարնանը ծառերը բողբոջում են, ծաղկում: Օրերը երկարում են: Ամենուրեք սկսում է կանաչել, բնությունը զարթոնք է ապրում: Նայիր քարտին, ի՞նչ կասես:




Երկարաշունչ ձմռանից հետո մարդիկ հանում են իրենց հաստ ու տաք հագուստները և մի քիչ թեթևանում: Իհարկե շատ չէ, քանի որ գարնանն էլ երբեմն ցուրտ է լինում, պետք է հաշվի առնել եղանակը:

Գարնան ամիսներն են՝ **մարտ, ապրիլ, մայիս**: Հարկ է նշել, որ այդ ամիսների ընթացքում էլ լինում են շատ փոփոխություններ: Օրինակ՝ գարնան առաջին օրերին՝ մարտ ամսին, եղանակը ավելի ցուրտ է, քան մայիսին: Հագուստ ընտրելիս պետք է սա հաշվի առնել:



Ահա գարնանային հագուստի տեսակներ: Այս բոլորը կարող ես կրել գարնանը, անվանիր դրանք և տեղադրիր գարնան քարտի վրա:



Գարնանը կրում ենք երկարաթև վերնաշապիկներ, վերնագգեստներ, վրայից հագնում բաճկոն, այնուհետև, երբ եղանակը քիչ-քիչ տաքանում է, սկսում ենք ավելի թեթև հագնվել:

Գարունն առատ է տեղումներով, դրա համար անհրաժեշտ է ունենալ անձրևանոց:



Գարնանը ծաղկում են ծաղիկները և իրենց անուշ բուրմունքը տարածում ամենուրեք: Ես շատ եմ սիրում ծաղիկներ:



Մայրիկը տանը սենյակային բույսեր ունի: Մենք երբեմն նրան օգնում ենք խնամել դրանք:



Հարկ է նշել, որ գարնանը տոնում ենք Մայրերի տոնը. այն հիանալի հնարավորություն է ծաղիկներ նվիրելու համար: Մայրիկը դրանից շատ է ուրախանում:



Երբ ավարտվում է գարունը, սկսվում է տարվա ամենաշոգ եղանակը՝ բոլորի կողմից շատ սիրելի ու սպասված **ամառը**: Ամռանն արևն ավելի շատ է ջերմացնում, հասունանում են մրգերը: Նայիր քարտին, ի՞նչ ես նկատում:



Ամռան ամիսներն են **հունիսը, հուլիսը և օգոստոսը**: Ամռան առաջին օրը՝ **հունիսի 1-ին**, մենք նշում ենք Երեխաների պաշտպանության օրը, կազմակերպում բազում միջոցառումներ, երգում, պարում, ուրախանում: Ամռանը շատ շոգ է լինում, և մենք կրում

Ենք շատ թեթև հագուստ՝ կարճաթև շապիկներ, շրջագգեստներ, կիսաշրջագգեստներ, կիսատաբատ և այլն:



Ահա ամառային հագուստի տեսակները: Անվանի՛ր դրանք և տեղադրիր ամռան քարտի վրա:



Այս բոլորը ամառային հագուստներ են: Պետք չէ մոռանալ նաև արքեսուարների մասին՝ գլխարկ, ակնոց: Դրանք անհրաժեշտ են արևից պաշտպանվելու համար:



Ամռան օրերին շատ ենք օգտագործում ջուր, քանի որ շատ շոգ է լինում:



Ամռանը զովանալու հրաշալի տարբերակ է նաև լողալը:





Ես ու Արան շատ ենք սիրում Վարդավառը և անհամբեր սպասում ենք, թե երբ է գալու այդ օրը, որ մի լավ ջրենք իրար:



Ամառը առանձնահատուկ է նաև նրանով, որ մենք շատ ենք իջնում բակ: Այն ամենահարմար եղանակն է ընկերների հետ լավ ժամանակ անցկացնելու համար: Մենք միասին խաղում ենք և զվարճանում:



Ամռան շոգ օրերից հետո մեզ հյուր է գալիս մի հրաշալի եղանակ՝ **աշունը**, և բնությունը տարբեր գույներ է հագնում:



Աշնան ամիսներն են **սեպտեմբերը, հոկտեմբերը և նոյեմբերը**: Աշնան առաջին օրը **սեպտեմբերի 1-ն** է: Այդ օրը դպրոցներն իրենց դռներն են բացում հարյուրավոր երեխաների առջև, սկսում է ուսումնական տարին: Եղանակը աստիճանաբար ավելի զով է դառնում:



Այս հագուստները կարող ես կրել աշնանը: Պետք է հիշես նաև անձրևանոցի մասին, չէ՞ որ աշնանը անձրևներ շատ են գալիս: Այժմ կարող ես հագուստի այս տեսակները տեղադրել աշնան քարտի վրա:



Աշնանը տաքն ավելի դուրեկան է դառնում, մենք կրում ենք երկարաթև հագուստ, վրայից էլ հագնում վերնազգեստ կամ բաճկոն:

Տերևները գույնզգույն են դառնում, նաև հասած մրգերը հավաքելու ժամանակն է: Իսկ խոր աշնանը ցուրտ է, հաճախ անձրևներ են տեղում, և տերևաթափ է լինում:



Ես ու Անին սիրում ենք զբոսնել և ոտքերի տակ լսել չորացած տերևների խշխշոցը:



Աշնանից հետո գալիս է տարվա ամենացուրտ եղանակը՝ ձմեռը: Ձմռանը օրերը կարճանում են, ձյուն է գալիս: Ձմռանը մենք նշում ենք մեր ամենասիրելի տոները՝ Նոր տարին և Սուրբ Ծնունդը: Բոլորն անհամբեր սպասում են այդ տոնին, զարդարում բնակարանն ու եղևնին, նոր երազանքներ պահում և համոզված են, որ դրանք անպայման կիրականան:



Ձմռան ամիսներն են **դեկտեմբերը, հունվարը, փետրվարը**: Ձմռանը պետք է տաք հագնվել, այլապես կհիվանդանանք:



Սրանք ձմռան համար նախատեսված հագուստներն են: Այժմ կարող ես դրանք տեղադրել քարտի վրա:



Ձմռանը, ինչպես արդեն տեսնում ես, կրում ենք հաստ հագուստներ՝ վերնազգեստներ, վերարկու, տաք գուլպաներ, ճութակոշիկներ: Պետք է հիշել նաև գլխարկի և ձեռնոցների մասին, որոնք մեզ պաշտպանում են սաստիկ ցրտից:



Ես ու Անին շատ ենք ուրախանում, երբ ձյուն է գալիս: Իջնում ենք բակ, որտեղ ամեն ինչ ծածկված է սպիտակ ու մաքուր սալանով, միասին ձնագնդի ենք խաղում, ձնեմարդ պատրաստում: Ինչևէ, այս ամենը շատ զվարճալի է:

Ուզում եմ քեզ պատմել, թե ինչ եղավ, երբ մենք շատ մնացինք դրսում:



Մենք սաստիկ մրսել էինք և հիվանդացանք:



Մեզ օգնության հասավ մայրիկը. չէ՞ որ նա շատ հոգատար է մեր նկատմամբ: Նա մեզ մի քանի օր անընդհատ տաք թեյ էր տալիս: Կատարելով բժշկի խորհուրդները, օգտագործելով տաք թեյեր՝ մենք շուտ առողջացանք: Այնպես որ հիշիր, որ զվարճանքն էլ պետք է չափավոր լինի. եթե մենք այդքան երկար ժամանակ չմնայինք դրսում, չէինք հիվանդանա: Պետք է մտածել նաև հետևանքների մասին:



Կարճ ժամանակ անց մենք առողջացանք: Ի՞նչ լավ է, երբ առույգ ես լինում:



Առջևում բոլորիս կողմից շատ սպասված տոնն է՝ Ամանորը: Ես ու Արան անհամբեր սպասում ենք այդ տոնին և սկսում պատրաստվել: Մենք խաղալիքներով զարդարում ենք տոնածառը, հագնում տոնական հագուստներ և անհամբեր սպասում նվերներին: Մենք նաև նոր նպատակներ ենք դնում մեր առջև, որ եկող տարվա ընթացքում անպայման իրագործենք դրանք:

Դու ինչպե՞ս ես անցկացնում Ամանորը, պատմիր այդ մասին:



Տարին մոտեցավ ավարտին, բայց հետո ամեն ինչ նորից է սկսվելու:

Հարկ է նշել, որ տարին սկսվում է ծնոանը՝ հունվար ամսին, և ավարտվում դեկտեմբերին:



Մայրիկն ասում է, որ տարին ունի 12 ամիս, այսինքն՝ յուրաքանչյուր եղանակ մեզ հյուր է գալիս 3 ամսով:



Կարծում եմ՝ կռահեցիր, որ տարվա եղանակների և հագուստների քարտերի միջև կար օրինաչափություն: Գարնան քարտերը կանաչ էին, ամռանը՝ կարմիր, աշնանը՝ նարնջագույն, իսկ ձմռանը՝ կապույտ: Երբ բոլոր քարտերը քո առջև լինեն, սա կլինի քեզ համար փոքրիկ հուշում:

Այժմ նայելով նկարներին՝ անվանի՛ր հագուստի տեսակները և տեղադրի՛ր դրանք համապատասխան զգեստապահարանում:

Գարուն-գարնանային հագուստներ- գարնանային զգեստապահարան



Ամառ-ամառային հագուստներ-ամառային զգեստապահարան



Աշուն-աշնանային հագուստներ-աշնանային զգեստապահարան




Ձմեռ-ձմեռային հագուստներ - ձմեռային զգեստապահարան



Արի մի քիչ զվարճանանք. դու կարող ես այս ճամպրուկների մեջ տեղավորել հագուստի տեսակները՝ համապատասխանեցնելով դրանք տարվա եղանակների հետ: Դե, քեզ տեսնեն:



Գարնան ճամպրուկ



Ամռան ճամպրուկ



Աշնան ճամպրուկ



Ձմռան ճամպրուկ



Այսքանը տարվա եղանակների և համապատասխան հագուստներ ընտրելու մասին:
Կհանդիպենք: